

四庫全書

集部

欽定四庫全書

集部
江湖後集卷二

詳校官庶吉士_臣朱理

助教_臣常循覆勘

謄錄舉人_臣秦櫟

謄錄貢生_臣王穀

欽定四庫全書

集部八

提要

總集類

江湖後集二十四卷

臣等謹案江湖後集二十四卷宋陳起編案起以刻江湖集得名然其書刻非一時板非一律故諸家所藏如黃俞邵朱彞尊曹棟吳焯及花谿徐氏花山馬氏諸本少或二十八家多至六十四家輾轉傳抄真贋錯雜莫詳

孰為原本今檢永樂大典所載有江湖集有江湖前集有江湖後集有中興江湖集諸名其接次刊刻之跡畧可考見以世傳江湖集本互核其人為前集所未有者凡輩豐周弼劉子澄林逢吉林表民周端臣趙汝鎰鄭清之趙汝績趙汝回趙庚夫葛起文趙崇嶠張渠姚寬羅椅林昉戴埴林希逸張煒万俟卨之儲泳朱復之李時可盛烈史衛卿胡仲弓

曾由基王謨李自中董杞陳宗遠黃敏求程
炎子劉植張紹文章采章粲盛世忠程垣王
志道蕭澥蕭元之鄧允端徐從善高吉釋圓
悟釋永願凡四十八人考林逢吉即林表民
之字蓋前後刊板所題偶異實得四十七人
又詩餘二家為吳仲方張輯共五十人有其
人已見前集而詩為前集未載者凡教陶孫
李龔黃文雷周文璞葉茵張蘊俞桂武衍胡

仲參姚鏞戴復古危稹徐集孫朱繼芳陳必復釋斯植及起所作共十七人惟是當時所分諸集大抵皆同時之人隨得隨刊稍成卷帙即別立一名以售其分隸本無義例故往往一人之詩而散見於數集之內如一一復其舊次轉嫌割裂參差難於尋檢謹校驗前集刪除重複其餘諸集悉以人標目以詩繫人合為一編統名之曰江湖後集庶條理分

明篇什完具俾宋季詩人姓名篇什湮沒不彰者一一復顯于此日亦談藝之家見所未見者矣乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

江湖後集卷一

宋陳起撰

華豐

豐字仲至號栗齋東平人南渡後居婺州淳熙十一年進士有東平集二十七卷

茅洋嶺背聞雨聲滿山細聽林上槁葉風過之
相戛擊而成音後先疏數中節清絕難狀蓬籠
夜雨未足為奇

日未出扶桑雲猶屯海嶽宛是欲雨時朝陰凜巖壑霜
林亂葉多荏苒乾未落颯颯滿空山細聽微雨作一葉
初自吟萬葉競相譔就彼最高枝相摩應宮角燥響欲
相憑風來能領畧湏臾不聞風但聽雨索索是雨亦無
奇如雨乃可樂風停葉靜時雨從何處著霜野物聲乾
終帶塵土濁蓬音非出虛瓢音太傷朴得似此聲清滿
洒過笙鶴天籟者非耶夔襄不能學

送湯麟之秀才往漢東從徐省元教授學詩

士游鄉校間如舟試津浦所見小溪山未省大島嶼一
旦遠遊學如舟涉江湖所見寢以廣變怪驚龍魚人生
本自有丘壑陋巷棲遲窮亦樂何必三江暨五湖始助
胷中疆界拓我言隨寓耳目移馬遷所以游會稽向令
俯俚但京國未必大放雄深詞君今濯秀雙溪水下語
不凡真可喜若使循為舉子文定自棘門兒戲耳古來
妙技如屠龍不療飢餒徒為工不如高科取富貴如一
棗葉持鉞鋒挾冊將游隨子國親賢況是諸侯客曾將

好手冠南宮行當闊步趨文石奮飛欲往氣莫降蒹葭
莽莽天雨霜揚瀾左蠡吞九澤大孤小孤插長江請停
詩筆莫容易大義聯翩且周禮原注將改
經從徐路途千里負
笈人併以經塗相指似

大孤

大孤小孤在何許大磯小磯忽當浦顛風吹浪未肯停
戕聽蕭蕭打篷雨今春積雪深復深爛銀猶照廬山陰
孤裘欲脫未可脫蟻醪當斟誰與斟晚來潮面烏如石

遙看知是長魚脊，箇人且下鐵狸奴。更與風波鬪，今夕

二蟲吟

鯤鵬至大兮，形載于莊周逍遙之篇。蟋蟀至小兮，名託于周公七月之雅。一則變化從天池，一則悲鳴入牀下。周公作詩陳艱難，瑣屑如與婦子言。天經地緯發真藻，特驅小物歸毫端。鵬大無倫世無有，揮斤八極隘宇宙。世人有眼不見鵬，直賴莊周為不朽。當年蟋蟀吟秋時，秦家宮殿隋家墀。鵬飛雖占九萬里，得地穩密誰如伊。

金史四庫全書
大鵬擊水翔寥漠蟋蟀逢春死籬落二蟲得失何厚薄
天晴日午槐花落

為舉子時所用方硯小童滌之誤傷其左角

巾箱硯子何處得溪翁用作待魚石博時不費杖頭錢
遂入余家掌文墨父祖相傳晚畀子自幼相隨真莫逆
七星象斗隱約明一口如池方寸窄憶曾携入對集英
僅畢春秋二三策後來隨宦落江湖同上武昌題赤壁
定交首尾三十年晏子狐裘虞老屐村童唐突豈偶然

一角微傷真可惜大禹圭璽猶缺殘因損不妨成友益
靈光一殿亦偶存小物本來甘弃擲贊經裨史則已多
論議失中天賜謫敬追子產謝叔向息黯補劓全吾璧

詠豫章蕉葉素扇

寶月乘鸞空復情頗嫌攜重愛携輕犀皮赤柄終傷俗
細骨洪蕉竟入清格調不殊蒲處士工夫全藉楮先生
文饒空賦桐花鳳絢麗虛成畫史名

原注李衛公有畫
桐花鳳團扇賦

海棠

金少卿集卷一
衙子來東海仙巢有鳳雛華開新棣萼蒼結小茱萸富
貴天專與嬌柔韻不麤輕盈飛燕趙韶麗彩鸞吳入譜
雖千品傾城但一株霧藏雲體魄霜染雪肌膚酒暈欺
西子冰姿笑藐姑暖風唇破玉寒雨淚凝珠蝶喜穿油
幙蜂羞賦蜜租葉如踈復密香似有還無淨灌岷江錦
濃施禁國朱欲眠湏客去佯醉索人扶劒外空逢杜黃
州却遇蘇已多歸綺繡唯未入氍毹
原注氍毹花多麤未見有作海棠者金谷
非佳妾雕陰是醜奴自珍紅頰輔應怪白髭鬚照樹呼

銀燭澆叢命玉轡有詩曾送別無力為噓枯尤物空凡
馬芳春過白駒尚憑花藻鑒摘句已成圖

炊熟日有愴松楸

小樓吹斷玉笙哀春半餘寒去復來五歲不澆墳土上
望江心折刺桐開

雪汀見二鷗三鵲對立

二鷗三鵲羽毛鮮立在方沙更可憐全似爛柯碁勢裏
白碁初讓黑碁先

周弼

弼字伯弼汶陽人文璞之子嘉定間進士江夏
令有端平集十二卷荷澤李龔又選而序之曰
端平詩雋

序曰汶陽周伯弼與予同庚生同寓里相與往
來論詩三十餘年嘗手刊端平集十二卷行於
世伯弼十七八時即博聞彊記侍乃翁晉仙已
好吟洎長而四十年間宦游吳楚江漢足跡所

到皆有作於七國兩漢三國六朝隋唐之體靡
不該備聲騰名振江湖人皆爭先求市但卷帙
中有晚學未能曉者稍多予恐有不行之弊茲
於古體歌詩五言律七言律并五七言絕句摘
其坦然者兼集外所得者近二百首目為端平
詩雋俾萬人海中續芸陳君書塾入梓流行庶
使同好者便於看誦吾伯弼平生心不下人今
隔九原聞予此選必不以予為謬實祐丁巳冬

金匱山志卷一
至日荷澤李龔和父述

石鐘寺

山前削成面山後不露骨何人戀巢居結屋寄突兀多
風鎖寒殿頻雨閉石窟筍透獅子傾草蔽鷗吻沒髑髏
串胡神纓絡纏古佛熏燈影摧殘槁栢香蓬藪丹葉夏
猶在綠樹暑未發坳徑鳴秋蛩閒堦起蒼鶻僧衣莓苔
侵齋鉢野菜掘梵庑止數卷矧能備巾拂奔波道塗間
體倦神屢竭大險阨在前醉夢魂恍惚信陋獲安處不

勝塵土汨經房晚棲禪殆亦未易忽鐵風終日叫心頗
惡此物欲去欲住間征帆已超越

送覺新上人還越

古越多精藍名僧遞相接青林瓶盂聚丹壑樓觀疊今
乘秋濤便莫待寒雨涉何處聞鳴菴虛廊掃黃葉

琵琶亭

蕭蕭楓林青雜出間椅櫓尚忍送行舟繫此木葉下雲
開星垂山水蕩月在野江空夜悵悵淚復誰滿把汀洲

泥沙換葭葦顏色假變遷斐然殊感慨益以寡黃煙飛
高桅絳雪當道灑餘春去不盡併放湓浦瀉豈無夜深
彈寂寞少聽者尚有沙灘人時時說司馬

題叢山僧竹閣

高閣俯人世越香清古岑林表山煙薄竹多苔色深露
笋翻曉籜雲房生晝陰天風自然來明月照我琴景豁
謝幽事竟日吟仙禽佳言出奇觀清梵揚空音子猷昔
好此故園今陸沉睠然顧茲賞蕭蕭生道心

牡丹

江南牡丹凡有幾德安打頭歛為二金陵舊物間有之
池陽吳郡皆居次地近京畿種偏好鄂城栽接不草草
春土篩泥繞畫欄石甃方壇淨如掃當頭第一帶鞵紅
膩紫嬌黃別作叢盤盃追出最迎日碧玉萬片藏春風
寶葉絲絲帶縷金錦斑酒暈閒攢心翻騰梔茵亂朱粉
樣各數名分淺深低樹猶高五六尺花重剛枝反無力
迴出層陰轉耐看始悟年深有真色晚添細雪來相簇

露醒香魂冷方浴倚柱黃昏眼倍明頓覺夜闌須秉燭
洛水芳林應更多不禁飛雨洗銅駝酥煎送酒有人在
草沒故園無柰何

鄱陽湖

鄱陽湖浸東南境有人曾量三十六萬頃我昔乘槎渤
澥間眇視天溟坎蛙井浪何為而起於青雲之底日何
為而碎於泥沙之裏太極初分一物無天水相包若鷄
子揚瀾可供李白青州杓彭蠡付與盧敖洗龜殼斗大

孤山沒處藏
斲取來楮鼎
鐫脚胸中八九吞雲夢似此
蹄涔亦何用
安得快意大荒之東東復東
指麾魚鱉騎
蒼龍

賦建寧浦城李頻行祠詩

建安梨嶽老梨木刻作唐朝建州牧香爐忽動吹寒灰
浦城環翠陰風來嶺頭頑石盡能走澗下奔泉皆倒回
猿猱啼兮鬼嘯野六玄虬兮四驪馬想湏吟遶碧草亭
舉手高翻白雲寫峯為文通名夢筆楊公書堂曾散帙

麗月鮮霞付與誰煙墅有人還築室田父何所祈贈爾
青麤黑桑椹里儒何所求贈爾黃梁布囊枕萬歲兮千
秋既往兮復留抽蘭心折椒口簸南箕挹北斗不假竹
枝歌何須折楊柳只用秦原妙絕詞傳入神經薦春酒
將適毗陵道中遇居簡上人

姑蘇觀下逢居簡帽子欹斜衣懶散自言契闊漫東西
雖老猶能青白眼知音不在禪床久抱刺懷書謹奔走
反舌無聲亂草間回首盡成獅子吼荒蕪野寺孤城外

赤葉黃蘆日相對
午睡雙鳩喚欲醒
起傍生臺炙肩背
弄筆濡毫摠蕭索
尚餘酒量添於昨
語盡橫塘笛未終
東風滿面楊花落
匆匆解纜攜程去
從此相期更何處
一椀官酤般若湯
把手同看獨孤樹

煙波亭避暑

澄江橫匹練
月洗黃羅扇
捲盡白雲衣
恒星撒沙見天
低欲就人夜色
凝深澱歛
吸動微光時
綈斗間線
涼亭逼曠野
軒楹敞三面
萬象悉鋪陳
隨機互遷變
十歲逃

虛空得此方一遍相對坐談玄終宵亦無倦只恐駁駁
催曉箭湧上東方老銅片湏著千求大帝君莫使陽烏
眼睛轉

久客思歸感興

久客空江上閒吟對石門青山非遠近流水自朝昏夜
月添鄉夢春風入燒痕翻思南郭路迢遞隔烟村

逸人壁

深僻人稀到天然野意成荷衝崩岸出草入廢泉生曝

木充山貨抽茶當地征未須尋伴侶時有自來鶯

江皋送別

把酒對汀洲相看發去舟迎風一分手驚浪幾翻頭燭
暗花消淚楓寒葉弄愁恐猶回首望終夕凭高樓

白羊

路隔一重溪山深容易危驛亭惟有額官堠盡無碑竹
掛黃身虺林香白面狸得船爭欲渡先奔槿花籬

靈竺寺

有孟
宗祠

不因純孝者古寺若為安
壁彩蝸遊遍爐香鼠踏殘
鐘聲斫破挺旂影颭危竿
尚恐冬生笋時來竹外看

送僧歸舊隱

自言歸去後只在故山邊
紗帽臨溪盥銅瓶傍水禪
晝閒松塔雨春盡草堂煙
何故相拋捨沉浮逐世緣

寄鶴林智福上人

深山高頂寺黃鶴舊曾留
鶴去無蹤跡山僧幾白頭
鳥閒齋鼓靜猿嘯佛燈幽
宿約何時踐題詩向瀑流

送僧妙通遊平江萬壽寺

故鄉離幾日何處躡秋陵
梵葉床頭樹唐衣壁面僧
雨花粘舊錫風籜掃寒簷
新謁期相寄呵彈破小乘

留別唐棲雲泉上人

水宿唐棲寺何緣更浹旬
千山今日路三歲異鄉人
小殿眠身佛空廊折臂神
歸時重作禮又拂一番塵

贈僧仲寶月溪

幽棲深絕地靜夜獨宜僧
上下兩輪玉中間一片冰
影

收懸罟索光息過船燈獨坐觀心了無由更小乘

送惟德上人還龜溪

為愛林間寺幽閒少是非因拋華門業來着稻田衣石
巖衝雲細山疏膩雨肥禪居安穩後更莫啟柴扉

送惠嵩上人住西山蘭若

孤雲無定迹又入亂山居既息禪機穩從教世網踈
晚香崑屋像寒呪石潭魚待我尋詩境看君坐隱廬

送黃同甫

人生各有安出易欲歸難古道春泥重孤城暮雪寒酒
鋒精似將詩業達於官野穀如堪飽從君借鵲冠

野橋

日暮野橋邊都歸醉客船數竿沙際日一片水中天影
落衝煙鳥聲移帶雨蟬殆非人境得江月又初圓

楓橋寒山寺

江楓吟咏工幽寺冷遺蹤不改前朝路猶聞半夜鐘地
涼汀月皎村迴水烟濃試問誰曾見惟應獨有松

送胡宗原還天台山

故里杉松表歸程筍薤初盃多常失飯囊罄只留書海
墨收秦棄山糧食禹餘古來仙隱者多在赤城居

千金寺

十載他鄉別春歸逐浪層晚晴沙市鼓夜雨石橋燈帆
側推乾葦衣寒脆薄繒舊時來往寺惆悵不逢僧

菩提廢寺

野寺孤僧住當春亦掩扉曉鐘三板去昏杵一盃歸古

屋垂山樞幽窻養石韋未容行客憇荒樹兩鳩飛

幽居漫成

便入空山住休傭漢省書薄雲翻藥畚斜日送柴車遠
業松花臘生涯薤葉踈抱琴誰共聽一尾食間魚
乍歸無定業蕭索帶村居神樹當中朽人家著外踈藻
痕千漂絮花影一床書何必為真隱相安便有餘

鹿苑寺

分半作民棲猶藏一曲溪鵲窺蓮葉座僧占菜畦白

蠹魚銷粉青乾獸剥泥幸留唐刻在相伴峻廊題

馬鞍寺

水國何年寺蕭條野渡邊僧驅田雀倦神抱海犀眠細
網垂秋屋殘燈泊暝船數家枯柳下猶有舊人煙

雙林寺

杳杳雙林路林深不易登寺幽憐宿鳥地僻喜聞僧靜
徹垂梁板寒銷背壁燈水邊人忽笑猿落過溪藤

訪別

聖代吟家衆無君衆體詩數奇官職見心苦道塗知積
夢難相寄流年自各悲金閨催製錦又復向黃陂

溪館送別

旅館成佳集臨觴送遠征厨烟含燭焰溪雨奪琴聲愁
動草邊色恨牽花外情明朝過平望應念隔春更

晚泊

芳草渡頭猿夜吟孤舟一繫百年心舊遊零落不知數
客路經過空復尋暮雪關山千里鴈夕陽烟火數家林

明朝嘆息東征士髮垢冠歌不欲簪

秀野

小作幽園傍宅開只須數畝占樓臺石移林屋秋雲至
水帶松江暮雨來徑草散香迎過屐砌花分影蔭流盃
人家園囿應無數不似君能日幾回

行吟

獨行沙岸不相携準擬沿溪更渡溪藥蔓交加蟲上下
柳花撩亂蝶高低杖頭曉伴春雲石屐齒晴翻夜雨泥

詩就隨時為人寫等閒抽盡錦中題

吳山仁王寺

山寺憑高夕未昏上皇曾此定乾坤
甌閩散驛緣江島龕赭收潮入海門
細雨亂花唐輦道淡煙疎柳漢營屯
何時汴水東流畔君返宸居臣故園

感事

書劒悠悠屢變遷老諳多故始知天
汗青每愧拋長日髮白無由逐少年
暮雨暗消江岸柳曉霜初透野池蓮

此心懸解何須語人問惟應一指禪

過荻港

波眼沄沄浪復輕稍甦羈束過清明倩人覓路先尋酒
久客懷鄉始見錫松下紫芽肥野菜竹間青葉帶山櫻
自從一別齊安後直到今朝始聽鶯

烏衣巷

日落凭欄感慨頻長干橋畔冷殘春桑田蕪沒徒多事
蘭玉叢生更幾人風暖影翻花外燕雨多痕蝕草間鱗

堪嗟羣從成功後不及鍾山一尉神

送趙山臺赴江陰

匆匆何事解朝衣甫為君王領一麾
歷考近來成故事就遷長是未多時
寒更夜徹防淮柝曉舶晴翻出海旗
不久赤䟽應已到只須畧賦練江詩

滕王閣

高閣巍峩接水濱興亡纔問便傷神
鳴鸞東閣知何處跨鶴西山別有人
柳映落霞江渚暮草鋪斜日野田春

羣鷗亦厭多悲感偏與忘機客最親

道中有感

遠程已過經行處別有逶迤古道存寺已寂寥猶有殿
水纔窮盡又逢村一株枯木人分路十里飛花客過門
畢竟悉依生處樂不知何事別家園

南樓懷古五首

昔人有意久經營極望寒蕪遠更平三國旆旌羣鵲散
六朝樓閣一鳩鳴雪消晴嶂沉孤壘風打寒潮入廢城

多少怨魂銷不盡草根燒斷又還生

事久銷沉只等閒好將深意遞相叅舳艫宵遁誰思忖
裙屐春遊自笑談西日瘴回迷漢沔北風波逆上江潭
隔城方唱招魂引一拍殷勤至再三

茫茫迂曲度平川何處孤村近水邊煙護劉琮殘壁壘
雨沉黃祖舊樓船寒沙細擁菰蘆地破隴斜耕苜蓿田
見說去年秋潦後更無茅屋起炊煙

幸際清時息五兵舌頑無處說縱橫蟻封一夢難分別

金定四庫全書
卷一
蝸角千年強鬪爭丹壁邨亭新蜀道白樓烽戍古邾城
自知夜半徒興舞移遠寒鷄不使鳴

夕陽光退杳難憑欲問江鷗只怨憎得意舉帆燒北岸
傷心流涕鎖西陵雪消蜀貨千檣下風順吳鹽萬斛增
且趲一樽相暖熱自非乘醉莫來登

夏日泛祕湖

朝來泛舟花滿湖亭午返棹風相呼已收波浪入菱芡
晚開雲日媚振蒲羣飛鼓翼數沙鴈一去沒頭雙野鳬

少留霽色定堪玩可惜歸程時已晡

黃溪

忽忽寧不恨飄零轉更分歧過別汀世事總如迂曲路
年華都付短長亭冢桃褪藥無人色社櫟盤根作鬼形
心自感傷人豈識回頭猶顧峴山青

會稽山

衣冠從昔化文身峻嶽當天自有神秦帝刻碑三十載
越王棲甲五千人江連雲氣分南紀海接星河近北辰

畢竟興亡誰可料但聞陵谷變飛塵

題西湖竹閣寺

精舍蕭疎近水涼分明一徑綠沉槍就移山近湖皆隱
放出樓高寺倒藏春透露梢齊曲檻曉翻風篠過修牆
長堤花盡人稀少來聽蟬聲伴夕陽

贈唐棲寺僧

山門寂寞唐棲寺別去閒居又一年草暗暮田羣鴈遠
花明春院一僧禪雲房夕磬浮清雨水殿寒燈宿細煙

作得詩成無寄處幾回遙認隔溪船

留題唐棲寺

僧房十日相留戀為怯生寒未到家
揀岸斷冰妨蕩槳入簷飛雪助煎茶
香臺穴碎逃秋蟻古殿巢翻失暮鴉
惟有溪梅最禁耐傍籬爭發向陽花

羅家洲

對港近村俱有路扁舟倍覺往來頻
入秋破褐惟存線盡日收錢不滿緡
遠岸冷沙啣墜葉淺灘寒水卧枯蘋

金匱要略卷一
未知行役何時斷縱使更深亦喚人

送人之荆門

昔年此路達王畿荒燒畬煙事已非山向峭函空北望
水隨江漢自東歸淒涼坂路征車遠寂寞郵亭候火稀
遙想思鄉怨岐路杜鵑花發鷓鴣飛

採香涇

繒甲如荼護此臺玉顏憔悴錦帆來一溪香草無蜂過
千里空葭有鴈回響屨蘚埋丹鳳迹縷衣花變粉蛾灰

誰知子夜歌殘日樹滿西山似綠苔

浮遠

橫障瀾漫恃此丘長江東驚轉湍流波間去海無多里
沙際鋪淮輒數州風勢起花山郭暗潮聲侵樹野田浮
無由望徹蒼茫外回首斜陽總是愁

鄱陽湖四十韻

巨浸連吳越高躔直斗牛玄明開別府江伯匯支流象
緯元精逼神姦祕怪哀番君䟽帶礪彭蠡壯襟喉赴隙

如無地凭孺忽有州津涯逾寫潤窟宅定剗幽島認瀛
鰲戴濤疑陣馬菟珠跳憐雨駛鏡滑識風收樹帶喬枝
隱山餘短碧浮窺規疲罔象睥睨態陽侯漾月都迷皓
蒸雲間作油涵濡均藻荇冗長到蝦鰵蜃幻晴虛閣龍
腥夜拔湫萬尋縣國玉一帶洞庭秋盈縮知誰紀吞并
似力擘鯉矜封赤鯀龜笑斥朱眸嵌竇扶桑齧珍文匠
石鏤鷗羣馴野客蛺肆傲潜蚪罟數筐零霰檣輕弩激
鏊孰分浮瓠澁或訝繞蛇丘絃索延商婦解艤送莫愁

陶朱誠得策神禹想遺憂端稱潺湲弄非無隱伏稼豆
分高下渚葦視去來舟血脉乾坤活瘡痍稼穡瘳披猖
包息壤瑣碎略浮溫蓮女嬋娟棹漁郎笔燥甌有人舉
繡被無客傲鸛裘貨貝窮乾沒醪羞肅丐求束枯論沃
釜戒覆比傾軛衆水杯盂外佗年吐納尤鵲填功未議
鯨吸志應酬何事輕恩濟吾防果未周沾危心骨醉飄
泊面顏羞敢計乘桴去何知戴笠遊片帆真擾擾隻影
轉悠悠卑濕嗟一作差梁傅星霜挂魏牟勞歌慙孺子破

簾付平頭烏豉緣尊置黃糧為鱠謀清螺取歸日穩棹
聽夷猶

仲宣樓

仲宣從倚思歸後又復誰傳獨步名自昔城闌雖尚在
至今波浪未嘗平半規赤日沈荒渚一縷黃煙起廢城
梅落碎花催塞色葭橫響葉弄邊聲驚寒牧馬頻西顧
趑趄暖賓鴻漸北征况乃有懷傷歲暮登樓那不動鄉情

冷泉幽憇

水源窮不盡垢膩生春襪未敢輒揭流且向幽亭歇

溪亭話別

芳時談古調雪浦少同人花日桃花外歸船便隔春

歲除思歸

山妻書到多日野渡舟橫幾回想見溪邊亭上故人待
我卽盃

春風冰斷千尺曉霽雲開百重何處溪橋爭渡誰家山
寺聞鐘

野屋定堆落葉山徑應鋪石蕪一別經秋不到隔籬黃
犬誰呼

題湖上壁

寒食風埃滿客襟西湖煙雨送愁頻日高未起鳥呼夢
春晚不歸花笑人

贈別水雲翁

離離雙鬢似秋蓬慣逐沙鷗與斷鴻漂母磯頭春水濶
扁舟何處繫東風

烟中梅

冷花踈藥竹間橫
淺薄籠烟淡作晴
悵悵野橋春水斷
幾回相見不分明

贈從古上人

山僧袖出新詩卷
字字馨香撲人面
清晨何處展看來
捲得梅花兩三片

回山僧書就題書尾

憶昔同行題落葉
寺前枯樹鶴巢邊
不知今度苔枝上

多少秋蟲已化蟬

寄雲泉僧永頤二首

書來只說住高峯不記松林第幾重
欲揀青巒問茅舍
秋山一樣白雲封

誦罷南華誰得聞
兩川寒玉一禪身
松邊彈石低聲念
莫引龍來變作人

逢僧文禮二首

空山落日又逢僧
雨雜塵灰滿帽紋
但憶來時門不掩

麝香偷卧石床雲

師說古香寮舊開鮑昭魯為惠休來至今猿鶴猶知敬
靜對寒星禮碧苔

四聖觀

小園寬占一山孤別有牆遮古觀居到了恩波攔不住
水窓遊出放生魚

女墳湖

石龜無語對東風海鶴曾迷曉市中三十六鱗朝夜月

金史卷一百一十五
卷一
玉釵人在水晶宮

詠史二首

一曲呼鳳下九霄石臺春動海山遙周秦戰血縱橫盡
猶卧白雲吹洞簫

碧樹童童蔭屋廬分明青蓋畫龍車南陽病叟成何事
便謂枯池沽得魚

客樓

水國秋清潮半生越王臺殿鎖荒城西樓一夜思歸客

斜倚朱欄獨聽笙

送人遊西山三首

昔人深夜看星斗鎮壓靈壇尚有符偷寫只應蒼鼠慣
幾行丹篆繞春蕪

鎖斷寒蛟亦有神冷波寒水病殘身誰收匙鑰權相借
畧放天池洗白鱗

抽鈎點汞舊臺荒何處搜尋舊草堂誰見洪崖最深處
一坑泥護石中黃

下渚秋暮

淺灘近渚沙相接水落漁人朝暮涉
撼撼風鳴若雨來
繞堤吹散乾荷葉

題野廟

野廟荒蕪到掩扉寂寥香火客來稀
年年歸燕相看覩
空滴春泥損畫衣

顯應觀桃花

白雲隨鶴乘將去深碧桃花滿故宮
三十六簧明月夜

不知何處吸春風

溧陽桃花

見說謫仙曾到此東風千樹鎖雕牆
游人偏向花間酌雨濕春泥噴酒香

風惡偶成二首

柔櫓雙隨下水船亂帆輕柁遞相先
無端繫着山村岸高枕蘆芽對雨眠

三日常行還止住冷沙寒水暗消春
一千四百蕪湖路

怨雨愁風多少人

秋日馬上詩

本無謀畧強談兵
每媿臨邊病未能
筋力豈知猶可喜
一鞍千里到江陵

思歸

關裏看山不識真
偶來軒檻振衣塵
諸峯便覺移相就
分付春風欲去人

點點楊花飛滿洲
只應催促送行舟
非關向晚傷心事

自怯春寒不肯留

盡日憑欄客興濃
山雖西遶水還東
便乘春暮家園去

猶及棠梨滿徑風

自覺才疎久願歸
敢將山色便相依
漢家事業雖全盛
亦放梁鴻一箇飛

道間偶成

彎彎田角路周遭
摘盡柔桑露淺蒿
無限寂寥門半掩

一車偏建夕陽綠

牡丹

莫對餘春起嘆嗟
最難保守是繁華
君看南渡百年內
看到子孫能幾家

延山渡

解帆登岸作山遊
林木茅茨共一丘
數日驟寒消不盡
尚餘殘雪護松瘤

江湖後集卷一

欽定四庫全書

江湖後集卷二

宋 陳起 撰

劉子澄

子澄字清叔泰和人曾知棗陽後較畫軍事為
賈似道所忌劉將孫稱其有史才所著有平淮
疏補史行於世事見江西通志案宋史子澄坐
唐州之役削秩而敗歟實由似道故志書云然
其詩亦有和似道者蓋一時倡酬之作也集名

金匱山志卷二
玉淵吟藁

憩南臺寺

居塵等出家涉世類行脚
岳靈招我隱雨止雲亦閣
乾坤錦囊收風月塵柄握
衆鳥各自鳴豈礙冲霄鶴

蒙泉行呈張敬父

玉龍蟠向荆山麓噴起雙泉
氷雪瀑琮琤萬古作寒鳴
冷浸一山渾是玉泉旁樹老
亦如龍泉根石濯瑪瑙紅
更有金蓮吐泉底歷歷星
在銀潢中池光六月如霜洗

藍橋倒影壺天裏
流下人間灌稻畦
歲歲家家飯雲子
我行荊州見山少
忽對林泉如久要
張侯引我飛羽觴
勸我為泉開一笑
我歌數語泉應聞
茲山古號荊州門
英雄過者心在鹿
安得泉聲到耳根
曹瞞疾馳玄德懼
潘璋設伏雲長怒
早知成敗等丘墟
悔不解鞍學巢父
英雄何在水長流
閱盡英雄過未休
今日為侯泉上醉
明朝西指鹿門遊

樅陽出陸

浮家無定日仕在水雲鄉棹別洞庭月帆迎赤壁霜早
寒裘代葛多病藥充糧明日樅陽客征鞍去路長

過鴻宿洲

洲名號鴻宿流徙合來居淮郡侵江密人烟罩水疎無
山供笛竹有港便罾魚壯士休營業功成返故廬

遊石門縣層山流杯亭觀卓錫泉

寺惟泉竄古有詠載州圖幾度流觴了長如卓錫初楚
山閩老住隋柏宋朝枯雨後人耕急荒岡帶月鋤

董宰見和用韻留別

謾辱君相送我行非壯圖
客程來又去人事久如初
句淡僧能和泉靈早不枯
升高莫怨險世路爾能鋤

武陵別任年魁

詔書應在道君但趣行裝
去棹乘桃漲朝衣帶芷香
歸齋尋舊話上殿拜新皇
論事依經好平遷是玉堂

壽星寺江湖偉觀

豈不近京都紅塵此地無
吳山青似越江水白於湖
天

接帆邊海烟生樹外晡危欄僧共倚莫恨旅懷孤

會真觀水簾

原注有晉石天尊像又唐鬼補鐘

觀近朱陵萃列真烟霞雖僻境長春若非火府煉神處
安用水簾遮世塵古像著靈多是石補鐘留跡似非人
尋源亦有桃花澗莫是山山可避秦

厲漕飲別海棠下索詩

天然翠袖隱豐肌好是胭脂未透時夜睡無香供蝶夢
晨粧有恨只鶯知坡仙具眼猶燒燭子美多情却欠詩

料得錦城花正好怨公底事訪春遲

又和

著雨胭脂沁玉肌絕疑妃子醉眠時未邀佳客閒來賞
已怪遊蜂早得知燒燭不妨循故事卷紗何惜賦新詩
羨君立就花前句我欲賡吟思苦遲

雲峯寺詩

原注寺在雲密峯禹得金書樵人
見碑處也上有丹窖玉牀禹溪

治水神書在此祁溪名猶似念胼胝當時民墊賴誰力
今日地平惟佛祠泉出玉牀疏作乳火生丹窖結成芝

雲峯自有樵人徑，岫嶠尋碑誤退之。

遊岳麓宮抱黃洞

連天七十二雲屏，真境先於翠麓呈。
洞發金光丹氣結，泉疏乳白玉華生。
江心鴈影重臨字，谷口禽呼自答名。
閒步不教方外覺，破烟雙鶴已來迎。

雲中寺

地僻層雲歸古禪，我來訪古尚依然。
越人重見流觴水，隋刹猶存卓錫泉。
石罅遺題思往蹟，巖隈紀事憶前賢。

可人不為時摩拂朝暮青山一抹烟

登祝融宿上封寺詩

并序

淳祐壬寅九日登衡之祝融風輕雲斂氣候
如春四盼神州流峙紫帶天低日近漏禪祥
如金虬夜宿上封寺見軫宿掛簷北斗可摘
晨起視羲輪湧出光變萬狀因思衡之視岱
距海為遠而日觀乃與岱等則其高並岱而
壓崧華也審矣因賦唐律命男拱辰書之

祝融尊與岱宗齊
仙境今容佛屋依
曉揖日輪知海窄
夜捫星軫覺天低
風高殿悉杉為瓦
雲冷僧常綿作衣
莫剪光天壇下草
時巡要秣六龍嘶

江陵逢黃虛舟

山谷機忘似白鷗
有孫今復號虛舟
信風為棹先開浪
與月同艙不載愁
吟就自將歌歎乃
醉時寧逐境漂流
乾坤等是虛舟爾
只好和詩莫帶休

和張功曹清明之什

蘭江無物可關情
春去春來感亦生
流水幾番供禊事
新烟兩度過清明
念鄉鵲淚和花滴
懷友鶯腸學柳縈
讀遍離騷詩自慰
世間無地不蠻荆

和賈秋壑南樓韻

大別磯頭江漢合
烟波堪詠亦堪圖
山標禹貢他州有
水列周南到處無
鶴外聲來蘄笛遠
鴻邊影落楚帆孤
登臨此地陪秋壑
收拾乾坤真玉壺

過金陵總卿吳履齋以詩贈別用謝

六朝三百有餘期不滿詩人一皺眉只有燕迷新巷陌
更無鳳集古臺基兵於史傳多陳迹酒與江山是已知
僕指長淮又西去輿圖向後更誰披

林逢吉

逢吉字表民東魯人有天台集玉谿吟草嘗修
赤城志及自為續志三卷世多稱之按張渠有
留別耘業林逢吉飯牛翁鄭簡子詩云天台山
下兩詩仙則逢吉本魯人南渡後流寓天台者

也

寄題鄭熙寧夫玉軒

良玉本不琢大音無希聲觀君命軒意欲以詩自鳴君
詩志古調考擊參差韻冷冷澗泉泣切切谿條清乎尹
露涵采潤美月泛英昔聞洛山中種者須其成非希咸
陽價匱韞那敢輕用之薦穹昊何但鬼神驚涼欲覺庭
葉夜疏耿鐙驚一讀一啓予古調真難評

重建神秀樓

慨昔淳熙初忠定守郡時樹樓城南門衆秀皆來歸揮
空綠千嶠注海合兩溪雲眉扁古隸蛟鳳躍出飛西瞻
建標霞東頰採菊籬循環一甲子天假茲良期象賢宣
祖烈布政軼吏師乘暇陟危級更新敞前規肆開落成
宴鐙月交明輝傑棟小芳桂修梁薄辛夷空濶渺納納
青紅濕離離太平畢文簡慶厯元厚之猗彼三碩輔勲
業疇或非公今繼其躅歲月幾推移魏謩寶遺笏鄭武
緇舊衣過者登斯樓咸誦金石詞卻笑楚臣作空因秋

氣悲

簡許遠元寮

問雲從何來明月翳光景須臾忽破散依舊寒炯炯問
月何能照月亦不自領雲來非我過雲去非我幸無心
付無事雖巧不能逞幽人起寤嘆婆娑弄清影世人有
萬端令人發深省

送天台李明府貫一歸越

赤城譚舊今為政且鳴琴澗瀑知清操山雲識苦吟自

金步四
卷二
廿微賤拙誰信勒碑深歸路春風近烟花繞禁林

餞台倅王司令幾叔參釐天府

黼坐頌泥檢黃圖駕玉星自應攄學業端不藉門庭凍
日湖梅白春風院柳青從今亨路去台嶺記曾經

山齋書事

掩卷聽蟬韻憑欄數雁行井風梧葉雨籬月菊花霜又
見秋將老那堪夜更長愁吟無語共殘燄落書床

挽都梁太守洪季輔寺丞

鼓吹舟歸日軍門巷哭時身拋淮郡印事入峴山碑敵
在家何用城危孰與持墓門今已閉千載使人悲

次韻酬陳之道明府見贈

為政鄙君日劬然似苦吟光前還照後行古却居今危
世道猶直故山春正深露生觀庶物清坐更觀心

送王季和文知施州二首

阜蓋蠶叢去青祇鳳歷頒雪林猿叫峽春院鳥啼山丈
字傳三楚恩威化八蠻政成明主召九虎啓天闕

宿幸依劉表時蒙說項斯方為感知賦遽作送行詩萬
里通吳蜀千山隔夢思江頭野梅發應記共吟時

送淨應老道源往浙石

片雲離海嶼吳地去隨緣托鉢應行乞升牀亦坐禪舟
停上塘雪寺隔過山烟刺史知聞舊無須覓鏡傳

訪懷遇師

獨隱重嵒裏全無物役心禪因秋月悟詩對晚雲吟訪
古猿驚錫拋生鳥上林相知今十載不憚遠來尋

送祖太長老住虎丘

英國前朝寺懸知補處難
岳雲迎外度海月定中觀
子去揮犀拂吾當賣布單
梅花知別意無語澹相看

初夏別墅

池館春方謝連朝雨似烟
亂荷藏睡鷺繁木集嘶蟬
地僻觀書樂心清得句玄
野僧時過我攜手弄雲泉

寄錢趙清中主上元簿

六代舊都遺跡在詞人懷古去
登臨長干塔上青山遠

玄武湖邊碧草深肯把簿書遮望眼但圖方畧副焦心
平江大海雖吾願臺閣須材必訪尋

寄聖水老法照

五載禪林結淨緣又飛一錫過甘泉曉池洗鉢雲常潤
夜閣繙經月自圓碧眼誰參庭畔栢赤身難並社中蓮
飽看勝景多佳句好為閒人寄一篇

送薛子範明府歸永嘉

天台邑債今還了未上清班意若何行李比如初到少

鬢絲贏得近來多
民輸界首攀車送
君向城隅枉騎過
恨滿東風不能到
柳邊鶯語即驪歌

次韻劉允叔丈主簿讀予所編天台集見贈之
作

樓頭殘月映儲胥
人在西窓酒醒餘
夢裏都忘閭風路
吟邊如到玉霄居
鄰牆共作無何飲
別墅期看未見書
祇恐弓旌便招去
漢家答詔待相如

輓王房州伯洪

崇牙出鎮古邊頭名與龔黃共一流方見勒碑歌善政
忽驚罷市哭仁侯燕飛古巷人千里梅落寒溪月一樓
前事已非那可問晚雲零落綠山稠

輓開府宋公

五朝大老今誰是曉月長庚可愴然王某曾當揮制日
伏生將及授書年雁峯去就朱輪養台嶺歸從白布纏
秩視冢司優贈典夜臺光寵射穹躔

輓新昌王明府吉甫

不見高人祇自悲，每哦佳句望烏衣。
浣花風月參謀去，採藥溪山茂宰歸。
萬里險艱頭已白，半生功業夢還非。
阿戎盍上青雲路，奕世清門要發揮。

輓處士張君

扣龍泉了探慈湖倦矣歸，攜一束書白首功名銷壯氣。
清溪游釣樂閒居，山人寧有趨戎幕。
方伯今誰顧草廬，鄉舊凋零無復見。
北風吹雨更愁予。

次韻沈興之稅院歲暮即事二首

一欄寒雨滴愁聲
贏得松齋睡思清
急景不知年又謝
壯心空悵事無成
溫存凍壁火初舉
陵鑠破窓風自鳴
多謝故交相慰藉
浪捐珠璧使人驚

穿雲時有一鴻聲
喚雪風來冷更清
臘意未教梅萼老
春風先放柳條成
亂離每嘆兵難戢
貧賤還憂道不鳴
節物一番空自好
暗添年紀却堪驚

題大慈寺蕪簡照講師

來從金地過銀地
智者修禪古道場
疊嶂倚空圍日月

穹聳松壑飽風霜碑文多是唐人刻經卷猶隨煬帝藏
偶值故交初入院一鐙留宿水聲房

梁民曹以二首為小園木香光寵次韻抒謝

春風珠幃走青虬清夜西園誰共遊十里水邊渾似雪
喚船應是誤王猷

攀條折藥屬騷人遲恐顛風掃玉塵如付枕囊供醉寢
繁香薰骨解留春

天台邵明府履善遺牡丹各一絕

人間興廢手搏沙喬木猶存少故家不見石邊題甲乙

空餘姓氏落名花

原註牛家黃

一春苦雨人憂花爛盡秧根穀再芽見說雲頭紅可喜

老農猶恐是朝霞

原註雲頭紅

可是東皇雨露深不成一字亦腰金世間大有麒麟楨

對此誰能起媿心

原註金繁腰

一枝美過玉杵盃歲晚何由復遇蘇我欲命名名不得

有名無實不如無

原註無名種

懷仙橋

晴雷晝夜激奔湍，澗草巖花亦耐寒。
劉阮茫茫空仰止，恐乘風月一鞭鸞。

送倪平仲高士歸天台

綠章封事步虛仙，來自東皇太乙邊。
滿袖明珠出光怪，又隨溪月上歸船。

桐栢山高空翠寒，夜深星斗近仙壇。
下宮銀瀑三千丈，付與詩人雨後看。

同謝鄒訪平老

江湖色笠今閒卻默坐惟繙貝葉文耳重懶聞時俗事
客來聊薦一甌雲

送宗鏡上人歸剡因寄聲高九萬孫季蕃

送師歸隱鏡山中萬壑千巖指顧間菊磴花翁如見問
為言憔悴老江關

神剎天劃成巖洞橫亘危梁接應真垂下玉虹三百丈
雪花飛濺一山春

一僧禮拜能行過下面人看膽亦寒月出幻成銀色界
始知方廣在林端

隨處禪房有水聲我來石上坐忘形臨行更酌潭中綠
要洗多生業障清

夜登桐栢上清閣

雨過中宵夜滿空一山松竹韻溪風披衣獨上上清閣
身在半天雲氣中

新昌道中

殘村時有兩三家
繚繞清溪路更賒
客裏不知春去盡
滿山風雨落桐花

剡中詩

遺踪曾記晉諸賢
乘興今無雪後船
斷塹毀垣難借問
輒文猶著太康年

題方叔所藏馬中遠春牧晚歸圖

一抹東風樹色新
牛羊莽莽散平原
微烟細草知歸路
竹塢人家半掩門

次韻王亞夫景存縣尉送春二首

欲勸東君盡一杯
臨歧無語獨遲回
晚風自有留連意
遮得鶯聲過柳來

登臨長是愛清暉
晚歲知心亦自稀
永晝松齋掩書坐
却看梁燕引雛歸

題六馬圖二首

駿影爭馳意氣雄
被塵晴苑碧溶溶
誰將妙筆開生面
霧鬣風鬃慘淡容

龍媒要是龍眠筆意在能空冀北羣
老我惟知賞神駿
何時變化上青雲

同錢則父登郡城觀予所和梅仲潛金山弔東
魯林表民逢吉詩淮民同賦一絕

水落寒沙晚照收沙邊誰復艤孤舟
鮑昭自作蕪城賦

難寫江南不盡愁

案此首不知作者姓氏題字疑有錯
誤原本附錄林表民詩後今姑仍其

舊

江湖後集卷二

欽定四庫全書

集部
江湖後集卷三
四

詳校官庶吉士_臣朱理

助教_臣常循覆勘

謄錄舉人_臣李憲喬

欽定四庫全書

江湖後集卷三

宋 陳起 撰

周端臣

端臣字彥良建業人御前應制有葵窻藁

西京少年行

西京少年兒生長豪貴族光浮兩臉紅春留雙鬢綠常
騎太宛馬多佩于闐玉明珠博美姬黃金酬麗曲朝從
咸陽遊暮向長陵宿朱門人候歸夜夜然紅燭

毋忽詩

毋忽咫尺水中恐有伏龍毋忽尋丈山中恐有毒蟲是
以古君子不敢欺盲聾審密言語間戒謹閤室中幾微
怠所防敵國起奴童事固不可忽理亦不可窮周室八
百年成於垂釣翁

僕以紹熙壬子中夏二十有五日始躋風篁探
龍井遂至廣福謁三賢像閱舊碑追觀一代風
流為賦此詩適月林依公留設茗供因書以遺

之他日能為我揭詩板于壁間使示來者亦山

中之一助也

原注龍井寺有辨才師
趙清獻蘇文忠塑像

奇石爛橫道茲山信多姿江湖醜兩股一泓乃孤危相
傳龍所家或恐神護持腥風轉霍霽陰崖立淋漓惜無
緯蕭勇探此抱寶癡山僧作屋意慘澹生幽思胡為金
繆影顛倒眩俗兒坐來百念失第官道前馳招提果深
登屐痕恍前期咄哉少肉山著此高顙師端能致遨遊
絕唱相娛嬉過溪亦何事相送了不疑渠能縛禪律因

來數鬚眉我愛秦郎記字壓頭陀碑月林只夜夜人物
自一時賢愚盡蟻封來者吾得知

二月芳草碧寄吳中故人

二月芳草碧江南新燕來撫茲良歲時佳人安在哉佳
人棄我去杳在天之涯天涯望不極叢愁結中懷翠觴
不成歡玉琴有餘哀西湖春事深林花為誰開折花無
所贈三嗅空徘徊樓前東流水湛湛生綠苔去波日千
里還繞姑蘇臺憑水寄我思旦暮腸九回

聽無悔琴

悟琴如悟道神閒若無營在心不在指以意非以聲銷
爾風篴韻泠然天籟鳴曲終各一笑相對無虧成

物蠹

太虛運元氣萬物皆憑倚物或有所違氣亦隨而否肉
蠹則生蟲木蠹則生蟻嗟哉政亦然於焉起姦究蠹久
不可為氣靡物自毀但得元氣存不患蠹不死

奉謝芸居清供之招

生平愧彼蒼得飽非耘種自揆蔑寸長居然叨薄俸竭
來桂玉地幸了藜藿奉日昨訪芸居見我如伯仲劇談
闢幽荒妙論洗沉痛呼童張樽罍芳醪啟春甕乃約屏
簾葦初筵俱清供珠櫻映翠莢光色交浮動佳境喜漸
入愜之未癡癢屬厭薦春萌雋永咀秋葑黃獨忽登俎
味借蜂蜜重翻憐少陵翁山雪入吟諷早韭晚菘輩吾
家所售用列品不自珍而與朋友共瑯盤放手空適口
頗恣縱日暮雨催返虛窓結清夢寄語五侯鯖從茲勿

勞送

孟冬多風霜

孟冬多風霜草木俱披靡老柳葉纔脫拂拂新萌起凍
梅如枯榛班班亦含藥寒暑運四時成此歲功美孰知
四時間獨有春不死

白虎行

女脩玄鳥開羸始附庸于周自非子由襄寢強三十世
末命昭莊踰崛起殺降濺血長平坑返戈盡篡天王城

黷兵不戢恃彊大物忌太盛終當傾邯鄲賈人識奇貨
發謀不惜千金破窈窕尊前歌舞人腹中已孕秦家禍
怙勢陵威奮餘烈怨氣秋聲九州裂虎暴狼貪天使然
六國未滅嬴先滅天道何曾長助彊豈知用柔能勝剛
君不見後來項羽戰無敵却使山河歸漢王

送翁賓暘之荊湖

君不見司馬子長志橫秋少年足跡不肯休胸中盤屈
奇偉氣筆力直與造化侔又不見杜陵子美夸壯遊一

身幾走半九州吟懷吐納天地秀作為篇章光斗牛君
今去去幾千里匣劍囊書赴知己知己從來素有情投
機之會趨功名功名豈有作能致莫辭跋涉長江行長
江四月南風起武昌魚飲秦淮水南風不久又西風食
魚休忘鱸魚美天涯別夢思城東何日一樽重與同草
橋夜醉月明下桃關晴吟春色中不堪蜀魄相催去却
憐檣燕相留住一片離情去住間正是遊人腸斷處荆
湖右道分南北勢與中原豈懸隔五湖膏血互吞噬萬

里烟塵入謀畫莫如子長子美但能事文章蚤歸來獻
平戎策

書逸人俞太中屋壁

羨君還似我居處傍林泉洗硯魚吞墨煮茶鶴避烟閒
唯歌聖代老不恨流年每到論詩外慵多對榻眠

贈岐賁推官

動靜不違書如君始是儒婢閑猶畫卦兒戲亦投壺門
冷僧長往官清道更孤吾君能大用皇宋即唐虞

寄唐異山人

不見琴詩友相思二十秋
能銷幾度別便是一生休
未得雲邊步還應雪滿頭
何時各攜杖竟去會嵩丘

遊下竺枕流亭

枕流亭下路兩歲不曾來
今日偶重到夕陽猶未回
池乾無水放地暖有花開後
約如能繼多應為探梅

題崇勝院河亭

陝郡衙中寺亭臨翠靄
間數聲離岸舫幾點別州山野

客猶思住江鷗亦忘還隔牆歌舞地喧靜不相關

作謝馮亞惠鶴

殷勤親惠鶴迢遞自江濱情性渾如我精神酷似君舞
思同座看喉想隔城聞從此添詩景為題好共分

真州梅

歌倒幾株梅黏枝半是苔相傳前代種曾歷太平來山
冷雪猶在春深花始開亂離無酒買嚼藥當銜杯

書冷泉亭壁

一酌野泉香脩然俗慮忘靜聽山鳥語如笑世人忙近
水苔常濕無風樹亦涼老僧閒似我清坐到斜陽

聞滁陽失守憶表兄

猶憶歸淮甸何期陷敵塵祗聞殘破慘未得死生真夢
不諳長路書難附使人吞聲無限淚一滴一傷神

裴墳

買船穿僻徑墳古最幽深山近風常冷松蟠畫亦陰來
時無速騎歸路有鳴禽寄語城居者何人肯訪尋

寄題石都尉林亭

園林都尉宅景好冠京華便合名金谷其如是石家池
塘分御水樓閣見宮花有客因來說令人動嘆嗟

冬日書事

一月天不暖前村到豈能閒閒啄木鳥疑是打門僧松
色濃經雪溪聲澁帶冰吟餘還默坐稚子問慵磨

虛室

虛室似僧房蒲團倚竹床半窓紅日影一陣紫蘭香誦

孰閒居賦書成急就章數朝門不出過却幾春光

湖天

湖天初過雨晴意有無間春水半侵路曉雲多礙山酒
煩村店暖詩就野亭刪風靜無啼鳥垂楊樹樹閒

暮春漳川閒居書事

吟齋漳水濱孤僻度殘春長喜詩無病不憂家更貧鍾
聲來遠寺山色遍諸隣門有誰相訪僧過豈厭頻

贈三門漕運錢舍人

相知有宿緣一見兩忻然我拙宜名野君廉恨姓錢唱
訓思閣筆迎送愧樓船却恐徵歸闕慵過砥柱邊

聞王衢王闢登第寄賀

人間第一榮初得好科名萬乘登樓看三台讓路行搜

羅空草澤宴會敵蓬瀛榜眼兼衣鉢偏怡野客情

原注
衢為

榜眼闕
為衣鉢

登駝巘嶺

登頓來忘倦閒常到亦難西風搖短鬢落日倚危欄山

迴江湖小秋高天地寬故園何處是空遣客眸酸

富景園詩

地比諸園小池從前代開猶餘喬木在曾見上皇來幽
徑埋黃葉空庭老綠苔荒寒吟思怯落日獨徘徊

初冬卽事

初冬天氣暖小似立春時萬樹無多葉千花試一枝天
紅霜有信星暈雨先期怕見梅花發愁懷未辦詩

讀黨籍碑

黨籍碑成國步屯忠臣埋沒瘴鄉塵興衰未必皆關數
治亂由來實在人雷昔震陵天已怒石今漫滅世尤珍
九原難叫諸賢起一掬傷心淚染巾

重陽後一日偕翁賓陽張敬之江樓分韻得臺
字

一笑江樓把酒杯闌干倚徧重徘徊風生別浦潮回去
雲暗前山雨過來秋冷丹楓先葉墜節遲黃菊未花開
憑高引領還興感昨日誰登戲馬臺

青銅香鴨詩

誰把工夫巧鑄成銅青依約綠毛輕自歸騷客文房後
無復王孫金彈驚沙嘴莫追蘆葦暖灰心聊吐蕙蘭清
回頭却笑江湖伴多少遭烹為不鳴

送牛首爐與人

千載墻間偶得存傳從鼻祖到雲孫土痕蝕處形摹薄
苔色侵來款識昏製樣想應規象鼎驗圖只合配犧尊
贈君博古齋中去書傳閒時細討論

謝長安孫舍人寄惠蜀牋

彩牋一軸敵瓊瑰喜見親題手自開
遠勝浣花人寄到
貴從視草客分來百張重疊霞初卷
十色參差錦乍裁
紅藥篇章方雅稱老夫無用擬封迴

晨興

夜長乞待得晨興
眈睡僮猶喚不應
燒葉爐中無宿火
讀書窓下有殘燈
臨堦短髮梳和月
傍岸衰容洗帶冰
料得巢禽翻怪訝
尋常日午起慵能

和三門寶程寺丞見贈

禹門公署似仙居
誰羨同年在直廬
閒製曲教鴉角唱
醉吟詩遣鳳毛書
蒙過村巷驚玄豹
命踏廳階上白驢
莫訝此篇酬更晚
只緣思澀豈情疎

懷寄河中表兄李徵君

蒲津棠樹兩閒人
我愧虛名帝亦聞
三世往還為近戚
一時通互喚徵君
雖同閉戶辭丹詔
尚阻連床卧白雲
苦恨中條鎮相隔
老來離思轉紛紛

代上劉郎中

彈壓江湖聳市朝相逢人盡說風騷詩從南嶽吟逾老
名得西山薦益高半世歷官纔幕府千年還國尚郎曹
兒時曾誦先生句鏡裏如今已二毛

古劍

籀文漫滅鮮花殘膽怯旁人不敢看飛去暗防風雨夜
握來光射斗牛寒曾成歃血諸侯約肯受無魚下客彈
寶匣秘藏英氣在提攜終擬斬樓蘭

送人失官歸

浮世功名總是虛縱然軒冕又何如
起無白髮來侵鏡
好買青山去荷鋤賢聖一丘無用土
英雄幾板可疑書
生涯儻了寒暄計獨抱遺經亦有餘

次韻友人悼寵落梅

條脫空嗟萼綠華俗塵難久駐仙車
數聲畫角單于塞
一曲山香阿母家墮砌尚疑粧後粉
點衣猶認唾時花
別來埋沒春風面幾度虛窓歎月斜

春日即事

起來袖手怯寒添冷落文楸掩玉奩燕子池塘春雨細
杏花庭院曉風尖酒醒未解便歌枕香炷初熏密下簾
百五數來能幾日黃金柳色已侵簷

遊秀府擇勝園

擇勝前朝錫雅名不多花木四時榮樓當列岫仍臨水
地比諸園最傍城池暖錦鱗冬亦泳洞寒丹鶴曉先鳴
宗王信是神仙侶創得蓬壺小樣成

咏鶴

原注分得
仙字韻

覓來雛鶴養經年認得呼名傍客前
放去幾隨雲過海歸來一片雪翻天
翎梳脩竹林間日影照寒梅磴下泉
眷戀軒墀應有謂主人風骨是神仙

落葉

變變霜紅不自持半隨流水半霑泥
歸巢便覺棲禽冷覓穴空教返蟻迷
風徑學花飛上下夜窓疑雨灑東西
滿階不聽家僮掃擬把新詩逐片題

次韻張敬之桂花

年年綠桂著花時黃雪團枝自一奇
林靜秋風生處早山高涼月上來遲
亭邊露濕欄猶倚書畔香清枕屢歌
惆悵淮南無夢到楚騷歌罷當吟詩

次韻勿齋蠟梅

不與南枝鬪粉光品題應合讓蘇黃
融成蜂蠟千葩秀散作龍涎幾陣香
立悟瞿曇真面目坐忘姑射舊梳粧
好風吹墮檀心句白雪空驚寡和章

碧桃

武陵夢覺艷粧空回首芳姿迥不同
萼綠仙留蒼玉佩
藥珠人在碧霞宮
素顯褪粉啼春雨
翠袖籠寒怯曉風
惆悵湧金池上路
闌杆倚遍夕陽中

靈隱山前即事

猿不聞呼僧已歸
翠煙依舊鎖崔嵬
水今流向人寰去
山昔飛從佛國來
古徑夏寒風落木
蒼崖陰潤雨生苔
客纓自喜無塵濯
歌罷滄浪飲一杯

春日閒居

自笑春來縱酒狂，信緣無定恣尋芳。
盃中似蟻浮來綠，瓮裏如鵝脫下黃。
花底枕琴迷洞府，溪邊濯足憶滄浪。
一從禁閣辭榮後，不復乘雲入帝鄉。

劉寺墳園

萬竹蒼寒擁寺門，寺牌金字御書存。
榮華肯信當年事，儀制空留後世恩。
影閣有燈塵網暗，殯宮無月土花昏。
見梅不敢輕攀折，恐是春風水際魂。

栖霞嶺

九折崎嶇入杳冥，蒼厓中斷見雲生。
著身高處不知險，回首省時方始驚。
半嶺雷奔空石墮，滿山花發曉霞明。
世間豈是無平地，何事吾儂愛此行。

遊籍田

國典斯為重，親耕示不輕。
詔洵正月吉，躬率百僚行。
奉禮儀，脩獻司農器具，呈儲胥嚴武備，鹵簿肅文明。
北闕班春早，東郊賀雨晴。
青壇晨氣潤，紫陌曉寒清。
玄武移

天仗鉤陳出帝城停雲依別殿翔鳥避行營十二蒼龍
駕三千白虎兵園花迎翠輦田柳拂霓旌少皞陳圭瓚
先農薦特牲紺轅紫黛邦蒼佩映朱紘俯講三推禮祇
勤萬乘情艱難均土庶次第及公卿海寓瞻秋稔山川
慶禮成豈惟知稼穡況乃奉粢盛祈歲稽幽雅因時昉
舜耕顧嚴天下勸非侈國人榮芸史觀先烈桑樞歎晚
生何當歲熙事夷夏頌隆平

古斷腸曲三十首

髻雲鬆滑鞦韆驚釵清減羞臨玉鏡臺蛺蝶也知人寂寞
一雙飛過杏牆來

催花一霎雨依微芳徑泥香草色萋萋可是一春天氣冷
牡丹開了未鶯啼

被擁嬌寒曉夢春起來無事翠眉顰金餅拈得雙青杏
搗破中心見箇人

竹葉裙紗摺摺香荷風占斷晚西涼年來歡事愁邊減
別後秋更夢外長

條風窻戶柳陰陰
雲碧春衫熨水沉
花裏小欄人不到
流鶯啼起去年心

夢破巫山生色屏
錦囊情薄歇餘馨
關河春晚無消息
腸斷樓前楊柳青

無計消除夜漏長
羅衾熏徹舊時香
十分又是淒愁處
雨歇芭蕉小院涼

香凝薇帳春風院
酒浣榴裙夜月樓
閒把花枝思往事
舊懽都變作新愁

一節涼雨歇亭臯
菡萏無香可得消
玉簫怯秋眠未穩
阿誰樓上夜吹簫

團扇多情手尚攜
金風庭砌拒霜開
斷腸一夜西樓雁
不帶書來帶恨來

破除難盡是恩情
却怕恩生怨亦生
思念不休心惑亂
夢驚人語似郎聲

一股金花擘斷釵
兩行玉筍界香顚
近來自覺冰肌瘦
柳綠春衫放窄裁

井梧和雨下銀床
梁燕隨風別畫堂
二十五聲秋漏永
夢回各自耐思量

錦屏殘睡思忡忡
心緒無聊酒易中
柳院蘚廳慵不到
斑鳩啼暖落花風

風色翻成料峭晴
閒期女伴踏青行
怪來昨夜燈花好
却是今朝鬪草羸

花庭梨雪疊香痕
燕子歸來亦斷魂
懊惱一場春不管
月明空自立黃昏

裏裏羅巾淚粉光
綠琴哀怨調淒涼
芳容自覺隨風老
落盡桃花暗斷腸

窓下親裁白苧衣
日長花影上階遲
不堪杜宇啼春苦
又是去年腸斷時

金風幾日老庭莎
經下窓櫺換碧紗
天氣已涼人尚遠
晚粧羞戴麗秋花

玉纖無力怯梳頭
鏡裏容顏見自羞
一陣落紅簾外雨
十分春是十分愁

舊家院落舊秋風只有當時人不同惆悵一窓無用月
為誰涼夜曬梧桐

脩竹生煙晚逗陰翠羅香袖怯寒侵恨同社燕身為客
怕剥秋蓮苦在心

壓髻慵簪雙鳳釵傷心羞覩合懽鞋折花暗卜郎音信
旋繫羅裙走下階

雙蛾顰翠恨天涯睡起蜂黃沁臉霞燕子日長深院靜
東風無力到楊花

春嬌殘醉睡初回
索酒扶頭強起來
金斗壓灰熏鴛褥
玉餅斟水養徘徊

蜂蝶飛飛春事忙
暖風池館百花香
連花折得青梅子
怕觸心酸不敢嘗

棟花篩雪糝蒼苔
人未歸來燕已來
滿眼春驚連日老
兩眉愁是幾時開

依舊斜陽燕子樓
共誰把酒話閒愁
韋娘去後西風老
爛漫黃花滿院秋

彈罷瑤箏歇雁行月移花影上回廊離情不奈秋蕭索
更著寒蟬管夜長

小雨班班濕畫欄一番重做杏花寒春衫拈起還慵著
却憶天涯客袂單

湖山園

丹樓碧閣面山開綠樹紅芳遶水栽多少好春閒過却
主人無暇不曾來

同用晦上人遊漢陂

漢陂寒水碧溶溶野客江僧望不窮更值晚來風雨歇
終南一半浸波中

落葉

西風不管鵲巢寒成陣飄來響更乾最是山房秋思客
夢回疑作雨聲看

送諤師赴王寺丞召寫碑

才高吐鳳欺黃絹墨妙迴鸞命碧雲雙美便堪傳萬古
羲之書法退之文

和江南提刑王國博見寄

欲寫情懷難一一擬尋山水隔千千輸他吳越閒鷗鷺
朝夕長親畫舸前

清明湖上

誰家園裏一聲鶯啼向春風似有情驚起少年遊冶興
插花沽酒醉清明

古墳詩

短牆摧倒樹歌斜碧齊春開滿地花馬鬣就荒無認處

墓前碑在野人家

題真妃出浴圖

百媚千嬌出浴時
君王凝盼轉魂迷
香肌猶恐紅綃重
可忍他年踐馬蹄

秋曉

一抹涼烟曉未收
露籬疎雨濕牽牛
不知天上秋多少
昨夜西風到小樓

湖上歸

別却吳姬舊酒壚
扁舟吹笛過平湖
晚雲又是商量雨
遮得秋山一半無

簡雪窻董寺丞

世路機心走兔
遠雪窻一縷不遮藏
箇雲梯月真游戲
茅舍何曾外玉堂

聖賢事業在心
槃禹稷顏回豈異觀
世故波瀾同起滅
姓名千古要清寒

鄰園晚步

忽然楊柳幾絲風
零落桃花數片紅
滿面好春吟不得
一園蝴蝶過牆東

寒食湖隄

紫陌笙歌簇禁烟
幾年無此好晴天
畫橋日晚遊人醉
花插滿頭扶上船

春月送人

一湖春綠染初成
柳色東風二月晴
燕子來時人却別
梨花雖好負清明

訓薛田推官見贈

紅蓮客惠碧雲篇未及他山買石鐫且選眼前簷竹上
和煙大刻兩三聯

元夕

小院春寒月到遲閉門閒課上元詩南來父老消磨盡
耳畔無人說舊時

謝人惠天花

花從天上落人間北客來稀路阻難勝味忽驚藜覓腹

春風腸斷五臺山

內人燒香圖

花底燒香深閉門宮鴉棲了已黃昏
君王未識無人妒
雖不承恩却感恩

買木犀花

拚却杖頭沽酒物湖邊博得木犀花
西風可是無拘束
一路吹香直到家

題葉靖逸東菴

一菴自隱古城邊不是山林不市塵落月半窗霜滿屋
卧聽宰相去朝天

二月五日西郊口占

晴日西郊按物華東風寒峭帽簷斜江梅已辦調羹事
交割春光與杏花

秋晚孤山

山夾寒雲晚不收蘋花洲渚雁聲秋西湖處士無消息
落日丹楓處處愁

夜歸

側側梅寒戀客衣
市樓燈比舊年稀
酒徒歌伴凋零盡
獨自吟詩月下歸

朱門

朱門茅屋偶為隣
北阮那憐南阮貧
却是梅花無世態
隔牆分送一枝春

謝劉大著寄惠玉牋

皎潔分明如我鬢
卷舒正直似君心
三千里外情多少

一幅真堪直萬金

早冬湖上

晴湖水落封田乾
白鳥飛來立晚寒
楊柳不知秋已遠
尚搖踈翠拂欄干

遣興寄徐抱獨

樓外垂楊啼曉鴉
樓中倦客醉思家
東風不管春將半
一夜清寒勒杏花

挽芸居二首

天地英靈在江湖名姓香良田書滿屋樂事酒盈觴字
畫堪追晉詩刊欲徧唐音容今已矣老我倍淒涼
詩思閒逾健儀容老更清遽聞身染患不見子成名易
簣終婚娶求棺達死生典刑無復覩空有淚如傾

江湖後集卷三